

Petrosay Domi Kágad

Petrosay Domi Kágad

© 2019 Wycliffe Bible Translators, Inc.

Gón Báibalay rajánk kanókén thimay komakká

[Creative Commons Attribution-NonCommercial-NoDerivatives 4.0 International License](#)

Petrosay Domi Kágad

Drud

1 ¹ Cha Issá Masihay hezmatkár o kásed, Shamun Petrosay némagá,
pa hamáyán ke cha may Hodá o rakkénök Issá Masihay páki o nékiá, hamá paymén bébaháén
báwaré rasetagesh ke márá rasetag.

² Shomá ke Hodá o may Hodáwand Issáyá pajjáha kárét, cha áiay zánagá shomay sará rahmat o
sohl o ásudagi géshter bát.

Báwarmandi zend

³ Áiá gón wati Hodái wák o kodratá, márá har zalurién chizz pa anchén zendéá dáttag ke Hodáyá
pasond ent. É chizz márá cha hamáiy pajjáh áragá rasetag ke gón wati néki o shán o shawkatá
márá gwánki jatag. ⁴ Hamé paymá, márá cha é chizzán wati bébahá o sakkén mazanén kawl o
wádahi dáttag tán gón Hodái zátá sharikdár bebét o cha hamá tabáhiá berakkét ke donyáyá hastent
o sellén wáhagáni bar o samar ent.

⁵ Paméshká wati wasá johd bekanét ke gón sharkerdiá wati báwará mohr o mohkam bekanét o
hamé paymá: gón zántá wati sharkerdiá, ⁶ gón shehm o rahdáriá wati zántá, gón sabr o ópárá wati
shehm o rahdáriá, gón Hodádóstiá wati sabr o ópárá, ⁷ gón á dega báwarmandáni dóst dáragá wati
Hodádóstiá mohr bekanét o gón sajjahén mardománi dóst dáragá pa báwarmandán wati mehrá
mohkam bekanét. ⁸ Parchá ke agan shomay nyámá hamé chizz bebant o berodant, gorhá cha may
Hodáwand Issá Masihay zánag o pajjáh áragá béasar o bésamara nabét. ⁹ Bale agan kaséá é sharri
mabant, allamá kamdid o kór ent o shamoshtagi ke cha wati pésarigén gonáhán pák butag.

¹⁰ Paméshká, oo mani brátán!^a Wati sajjahén johdá bekanét tán é gwánk janag o gechén bayagay
tahá mohr bóshtét, chiá ke agan chosh bekanét, hechbar thagala nawarét. ¹¹ Gorhá pa shomá may
Hodáwand o rakkénökén Issá Masihay abadmánén bádsháhiay darwázag, pa delpachén wasshátkié
pacha bit.

¹² Paméshká man harwahd shomárá é habaráni tahtál o hayálá perrénán, bell toré shomá é
habaráni wata zánét o é rástiay sará mohr óshtátagét ke shomárá rasetag. ¹³ Tánke man wati jesm o
jánay é tambuá^b án, mani hayálá sharter hamesh ent ke é chizzán shomay yátá byárán o tahtál
bedayán, ¹⁴ chiá ke zánán kammén wahdéá rand é tambuá roksata kanán. Hodáwandén Issá Masihá
maná cha é habará sahig kortag. ¹⁵ Wati wasá johda kanán ke mani marká rand ham, har wahdá é
chizzáni hayálá bekapét.

Chamdistén sháhedi

¹⁶ Wahdé má Hodáwandén Issá Masihay zór o kodrat o áiay per tarragay bárawá habara kort,
pa cháláki jórh kortagén kessaháni randgiriá naatén, má gón wati jenday chammán áiay shán o
shawkat distagat, ¹⁷ á wahdá ke Hodáén Petá Issá shán o sharap dát. Porshawkatén tawáré pa
Issáyá átk o gwashti: “É mani dóstén bacch ent, man cha eshiá báz wassh o razá án.” ¹⁸ É tawár ke
cha ásmáná átk, má hamá wahdá wat eshkot ke gón áiá pákén kóhay sará atén.

¹⁹ Anchosh márá nabiáni pakkáén habar ham hastent, sakk sharr ent ke áiay némagá delgósh
bekanét, cherágéay paymá ent ke taháriá drapshit, tán hamá wahdá ke róch bebit o bámay estár
shomay deláni tahá sar bekasshit. ²⁰ Masterén habar esh ent ke bezánét Pákén Ketábay hech
péshgoí, nabiáni jenday máná kortagén naent ²¹ chiá ke péshgoí cha Ensánay erádah o wáhágá
dhann ent, Pákén Ruh mardománi delá neshtag tán cha Hodáay némagá habar bekanant.

Drógén nabi o áyáni sezá

2 ¹ Bale mardománi nyámá drógén nabi ham hastat, hamá dábá ke shomay nyámá drógén ostád
wadia bant ke chérandari bérán kanókén báwarán rawája dayant, tantaná wati Hodáwandá
ham namannant ke gón wati hóná pa bahái zortant. Á gón tézén gár o bégwáhiéá dochára kapant.

^a1:10 “Brátay” máná har báwarmand ent, mardén o janén.

^b1:13 Tambu, bezán haymah.

²Bázéné esháni badkáriáni randgiriá kant o rástiay ráh, é ostádáni sawabá kalág gerag o béhormat kanaga bit. ³É ostád, wati tamah o jópaháni háterá gón habaráni chál o prébá shomárá polant. Bázén wahdé bit ke áyáni sará mayárbáriay shawr borrag butag. É shawr purah kanaga bit o áyáni tabáhi wábé naent.

⁴Hodá tantaná cha hamá préshtagán sar nagwast ke gonáhesh kort o tahtarunay^c tahárterén tahárókiá band o zamzili kortant tán dádrasiay róch berasit. ⁵Cha kwahnén jaháná ham sar nagwast o Hodánábáwaráni donyáay sará tuppáni áwort o tahná Nuh ke rásti o pahrézkáriay jár janók at, gón hapt kasá rakkénti. ⁶Hodáyá, Sodium o Gomurahay shahr ham sótk o por kort o cha zeminay sará gár kortant, tán pa Hodánábáwarán dars o ebraté bebant o ⁷pahrézkárén Lut ke cha násharén mardománi selli o badkárián sakk delranj at, rakkénti ⁸(parchá ke á nék o pahrézkárén mardá hamáyáni nyámá zenda gwázént o Lutay pahrézkárén ruh, har róch cha á násharén kárán sakk padarda but ke Lut gendag o eshkonagá atesh). ⁹Gorhá hamé paymá Hodáwanda zánt ke wati pahrézkárén mardomán chón cha chakkásán berakkénit o badkárán sezá bedant tán hamá wahdá ke dádrasiay róch berasit. ¹⁰Hodáyá kahr o sezá hás hamá mardománi sará kapit ke wati jesmay maháresh sell o nápákén wáhagáni tahá yalah kortag o hech wák o kodratá namannant o mána nayárant. Haminchok tamard o porkebr ant ke cha ásmáni zórmandáni sobakk kanagá torsesh nést. ¹¹Bale préshtag ke cha é zórmandán zórákter ant, angat Hodáwanday bárgáhá eshán sobakk o bézzata nakanant.

¹²É mardom násarpad o bázobánén jánwaráni paymá ant. Hamá kárána kanant ke áyáni sareshta^d gwashit o tahná pa gerag o koshagá pédá butagant. Hamá káráni sará maskará o rishkanda kanant ke sarpadesha nabant o jánwaráni paymá gár o bégwáha bant. ¹³Wati gandahén káráni sezá o padmozzesha rasit. Áyáni shádahi hamesh ent ke róchay rozhnáiá mast o hanósh bebant. Gón shomá hór warák waragay wahdá, á wati aysh o nosháni tahá gark ant o é pa shomá bannámi o pólengé bit. ¹⁴Gón nápák o zenahkárén chammán, hechbar cha gonáhá séra nabant o sost o nezórén mardomán pa mandr o repk wati dámá perrénant. É mardom tamah o lálechá balad o zántkár ant, nálat butagén ant. ¹⁵Cha rástén ráhá dar shotag o cha Bahuray chokk Balyámay ráháy randgiriá gomráh butagant ke wati sellén káray mozzi dóst at. ¹⁶Bale áiay bázobánén har, ensáni tawárá habará lagget o Balyámi áiay gonáhay sará sarzanesh kort o á nabii cha ganóki kanagá dásht.

¹⁷É paymén mardom hoshetagén chammag o anchén báp o horm ant ke tuppán áyán har némagá bárt. Tahárterén taháróki áyáni ásar o ákebat ent. ¹⁸É, batháka janant o habaresh puch o hálíg ant. Hamá mardomán gón jesmi badén wáhagán préba dayant o wati dámá perrénant ke nóki cha radkáráni dastá rakketagant. ¹⁹Áyán ázátiay kawl o wádaha dayant bale wat selkáriay golám o bandig ant. Chiá ke harkas chizzéá wati wájah o mastera kant, wat áiay golám o bandiga bit. ²⁰Har wahdé ke mardom gón may Hodáwand o rakkénók Issá Masihay zánag o pajjáragá cha é donyáay selkáriána rakkant, bale cha rakkagá rand padá hamá selkáriáni tóká bekapant, randi hálesh cha pésarigéná ham gantera bit. ²¹Agan é mardomán cha páki o pahrézkáriay ráhá hech mazántén, pa áyán gehter at cha eshiá ke zánagá o rand, cha é Pákén hokmá bebajjant ke áyáni sepordah kanag butag. ²²É batal áyáni bárawá chón wassha gwashit ke:

“Kochak wati shántagénáni kerrá pera tarrit.” ^e

o

“Shoshtagén hukk padá pujgeláni^f tahá létha wárt.”

Hodáwanday róch

3 ¹Oo dordánagán! É nun domi kágad ent ke pa shomá nebiságá án. Har doén kágadon pa é sawabá nebeshtant tán shomay delá sharrén pegr o hayáláni hobb o wáhagá pédá bekanán o shomárá tahtál bedayán ²ke hamá habárián wati yátá byárét ke gwastagén zamánagán, péshigén pákén nabián gwashtagant o anchosh ham may Hodáwand o rakkénókay hokmá shomay hayálá byárán ke áiay kásedán shomárá dátág.

³Cha har chizzá pésar bezánét ke áheri zamánagán, é paymén maskará o rishkand kanók jáha janant ke wati sell o badén wáhagáni randgir ant. ⁴Gwashant: “Gorhá áiay áyagay wádah chón

^c2:4 Tahtarun, bezán jahannam, dózah.

^d2:12 Saresht, bezán báten, fetrat, jawhar.

^e2:22 Solaymánay Bataláni Ketáb 26:11.

^f2:22 Pujgel, bezán puglich, pussetagén gel.

but? Cha hamá wahdá ke may pet o pirén mortagant, har chizz hamá paymá ent ke cha jahánay jórþ bayagay wahdá butag.”⁵ É paymá pa zánt, wati chammán cha é rástiá banda kanant ke ásmán, Hodáay habaray sará, cha dérigén wahdán hastat o é zemin, cha ápá o ápay ráhá jórþ butag o⁶ cha hamé ápá á zamánagay donyá boddhet o gár o bégwáh but.⁷ Cha hamá hokm o habará ham sajjahén ásmán o é zemin, pa ásá gechén kanag butag o tán dádrasiay róch o nábáwarén mardománi tabáhi o zawl bayagá dárag butagant.

⁸ Bale, oo dordánagán! Cha é habará békayál mabét ke pa Hodáwandá yak róché, hazár sálay paymá ent o hazár sál, yak róchéay paymá.⁹ Lahtén mardom gománá kant o gwashit ke Hodáwandá wati per tarrag o áyagay kawl o wádah mahtal dáshtag, bale chosh naent. Rástén habar esh ent ke Hodáwand gón shomá sabr o ópára kant, wahd o móha dant tán gonahkár pashómán bebant, chiá ke nalóthit kassé gár o bégwáh bebit.¹⁰ Bale Hodáwanday róch allamá kayt. Chosh ke dozzé anágata kayt o sajjahénán jáha serrénit. Á róchá ásmán gón torsnákén tawár o bustagé gár o bégwáha bit, estár o máh o róch o harché ke ásmáná hast, ásá kapit o ápa bit o zemin o harché ke zeminá hast sochit o pora bit.

¹¹ Nun ke zánét harché may chágerdá hast gár o zawl bayagi ent, gorhá báyad ent shomay zend pák o palgár bebit o pa Hodádósti begwazit.¹² Hodáay róchay entezár o wadará ham bebét o johd bekanét ke á róch zutter berasit, hamá róch ke ásmána sochit o ápa bit o estár o máh o róch o harché ke ásmáná hast ásá kapant o ápa bant.¹³ Bale má nökén ásmán o zeminay entezár o wadará én ke áyáni tahá adl o rásti hákema bit. Chiá ke é Hodáay labz o wádah ent.

Goddhi habar

¹⁴ Oo dordánagán! Nun ke é chizzáni wadará ét, johd kanét á shomárá pák o béayb o gón wat pa sohl o árámiá wadi bekant o begendit.¹⁵ É habará ham mashamóshét ke may Hodáwanday sabr o ópáray maksad rakkénag ent, anchosh ke may dordánagén brát Pulosá gón Hodábakshetagén hekmaté pa shomá nebeshtag.¹⁶ Wati sajjahén kágadáni tahá hamé bárawá nebisit. Á kágadáni lahtén habaráni zánag o dar barag grán ent o násarpad o nezórén mardom á nebeshtahán wati tabá chahra dayant o pa radi máná kanant, bale é mardom wat zawała bant. Gón Pákén Ketábay á dega nebeshtahán ham hamé kárá kanant.

¹⁷ Paméshká, oo dordánagán! Nun ke shomá é sajjahén chizzán cha pésará zánét, pahréz kanét tán radkár o násharén mardom shomárá wati gomráhiay némagá mabarant o shomá wati mohr o mohkamén zendá mabáhénét.¹⁸ May Hodáwand o rakkénók Issá Masihay rahmat o zántá rodóm gerán bebét. Shán o shawkat annun tán abad, hamáiá berasát. Anchosh bát, ámin!